

MANIFESTE AVROY,

CONTENANT QVEL DOIT ESTRE
LE CONSEIL

D'VN PRINCE.

A LA GLOIRE
DV PARLEMENT.

Par L. S. D. T.



A PARIS;

Chez DENYS LANGLOIS, au mont S. Hilaire,
à l'Enseigne du Pelican.

M. DC. XLIX.



MANIFESTE AV ROY,
Contenant quel doit estre le Conseil
d'un Prince.

A LA GLOIRE DV PARLEMENT.

Par L. S. D. T.

SIRE,

Les Princes estans les Images viuantes de Dieu, nous deuons croire par cette raison qu'ils font tout avec Iustice, le respect & l'obeyssance que nous leur deuons, ne regardent pas simplement leurs personnes, mais aussi l'autorité que Dieu y a mise. Les meschans la possèdent aussi bien que les bons; & partant il veut que nous les reconnoissions également, & reuerions comme l'image de sa puissance, ceux que nous ne pouuons pas aimer comme l'image de sa bonté. Ce sont des hommes deuant Dieu, mais ce sont des Dieux au respect des autres hommes: la vie & la mort de ceux qui leur doiuent obeyssance, sont entre leurs mains; & parce que leur puissance vient du Ciel, elle ne peut estre empeschée que de ce costé-là: Il faut donc que les Subiets, qui ont pour leurs Princes des hommes cruels & vicieux, supportent patiemment les effets de leur fureur & de leur impiété, & qu'ils fassent comme la terre, qui souffre les malignes influences du Ciel sans s'éleuer contre luy.

Il est vray que le plus grand malheur qui puisse arriuer à vn

Prince, c'est de croire qu'il luy est permis de faire tout ce qu'il luy plaist, & tout ce qui luy est possible. Je sçay que ces sentimens viennent aux Princes par les flatteurs, qui ne manquent iamais de leur recommander la grandeur de leur pouuoir : & j'ay appris de Senèque, que les Grands dans l'abondance de toutes choses, ont besoin de personnes pour leur dire franchement la verité qu'ils sont obligez de suivre. La crainte que nous auons, SIRE, que vostre bon naturel ne soit corrompu par vne telle peste de gens qui vous obsedent, m'oblige de vous proposer icy quelques exemples des grands Princes qui ont heureusement regné, pour les imiter en leurs actions, & au chois des personnes que vous devez faire pour vous aider à conduire ce grand Nauire de vostre France. Sans doute nous aurions desia ressenty des effets de la bonté de V. M. si vous n'en estiez empesché par les loix de l'Estat, lesquelles vous soumettent durant vostre Minorité, à la volonté de ceux qui gouvernent, & qui veulent faire leur fortune aux dépens de la vostre. Vostre âge n'a rien de puerile; vous avez acquis auant le temps les qualitez d'un Prince acheué; vos mœurs nous representent ces Heros dont vous estes fort, & vos actions nous assurent, que vous estes ce Present que le Ciel nous auoit promis pour soulager la France.

Cela estant, SIRE, j'espère que vous verrez de bon œil cette Lettre, que ie ne vous escriis, que parce que la Fortune ne m'a point encor donné de place auprez de V. M. pour luy dire de bouche ce qu'il faut qu'elle sçache. Je m'assure que vous ferez vn bon accueil à ces Illustres que ie vous presente, lesquels par leurs rares vertus ont esté surnommez les Delices du monde, les Peres des Peuples, & les Restaurateurs du Genre humain. C'est sur le modele de ces grands hommes, SIRE, que vous vous devez former, pour rendre vostre regne le plus glorieux, le plus triomphant, & le plus chery de tous les autres qui l'ont precedé : C'est par l'estime des gens de bien, & par les employs qu'ils leur ont donné, qu'ils sont arriuez à ce comble de gloire & de reputation, & c'est par là que V. M. doit regner, c'est à dire, par les conseils des Sages, & sur tout de vostre Parlement, comme vous allez voir.

Platon, & les autres Philosophes de sa Secte, se sont seruis d'une similitude fort propre, quand ils ont comparé l'autorité d'un Souuerain, & la prudence de ses Conseillers, au cours & au mouuement du Soleil, par lequel il fait les iours naturels, & forme les années. Car qui est-ce qui ne void, que ce mouuement

journalier, qui marque les iours naturels d'une matinée à l'autre, est admirable, rapide, & violent ? Cela ne nous représente autre chose, qu'une autorité souveraine de soy, sous laquelle les hommes tremblent, gemissent, & craignent. Quel est celuy qui ne void pareillement, que le cours annuel du Soleil qui acheue les ans, s'oppose à ce mouuement rapide diurnal, non pas directement, mais allant du Couchant au Levant par le Cercle oblique du Zodiaque ? Il tempere par ce moyen la rapidité, la violence, & l'impetuosité du mouuement quotidien ; & par sa douceur il distingue les saisons, il nourrit & entretiét tous les animaux, sans laquelle ils mourroient.

La prudence des Ministres d'un Prince n'est pas d'un moindre effet, quand elle s'oppose avec la bonne grace, la raison, & la Justice, à cette Puissance souveraine, qui est de soy impetueuse & redoutable : elle maintient l'Estat, qui tomberoit en ruine, s'il n'estoit appuyé de ses sages conseils. Les exemples de cecy se voyent ordinairement és Princes qui sont mal conseillez, lesquels abusent de leur puissance, & la conuertissent en Tyrannie, en commettant des violences, des rapines, & des iniustices, qui sont les causes de leur perte, & de la Monarchie. Nous ne pouuons pas douter à present de la verité de la Maxime des Politiques & des Philosophes, que les choses violentes ne peuuent estre de longue durée. Voila, SIRE, le premier effet du bon conseil, puis qu'il fait regner le Prince dans ses Estats, en luy faisant rendre l'obeyssance qui luy est deuë, & respectiuelement rend les Subiets heureux sous sa domination.

Ie viens, SIRE, au second effet du bon conseil, que ie trouue grandement auantageux à un Prince pour l'honneur, & la reputation qu'il luy fait acquerir. Car, supposé qu'un Prince de luy-mesme ne fust gueres sage, ny bien intelligent, si est-ce qu'on l'estimera tel, s'il le prend des sages Conseillers, desquels il suiue les auis : parce que nous voyons ordinairement qu'on luy attribue les effets de toutes choses, comme sont les Victoires, les Conquestes, & les Batailles qu'il aura gagnées par les Capitaines ; ou bien les bons Reglemens, les Ordonnances, & les Loix qui auront esté faites par ceux de son Conseil. Une autre raison par laquelle un Prince est obligé de n'auoir auprès de luy que des gens d'honneur, est que les vices, & les defauts de ceux qu'il employe, luy sont tousiours attribuez, à cause de leurs actions, que le peuple croit emaner de celuy, sous le nom duquel, de son autorité, & de son pou-

voir

uoir toutes choses se font. L'adiouste pour troisieme raison, qu'il est impossible qu'un Prince qui aura d'habiles Conseillers, n'apprenne tous les iours avec eux, & ne se rende capable de gouverner son Estat, sinon qu'il fust tout à fait stupide & depourueu de sens commun. Neantmoins quelques bons Conseillers qu'un Prince puisse auoir, il ne se doit iamais tant reposer sur eux, que de ne vouloir point connoistre de ses affaires. Cét excellent Conseiller (le sieur de Commynes) leur apprend bien ce qu'ils doivent faire, quand il leur dit, que Dieu n'a point estably la Charge du Prince pour estre exercée par des bestes; & il se moque de ceux, lesquels quand on leur parle de quelque affaire, respondent, Je ne suis pas Clerc, ie laisse faire aux gens de mon Conseil, auxquels ie me fie; & là dessus s'en vont à leurs plaisirs: disans, que s'ils auoient esté bien nourris en leur ieunesse, ils allegueroient d'autres raisons, & souhaiteroient d'estre estimez tres-sages & vertueux.

Le troisieme effet du bon conseil, SIRE, n'est pas moins utile à un Prince que les deux autres, estant bien certain, qu'il le fait craindre de ses ennemis & des estrangers, qui difficilement pourroient reüssir, s'ils auoient le dessein de s'attaquer à luy. Je ne veux produire sur ce sujet, quel exemple du fameux Hannibal, qui estoit un Capitaine également vaillant & sage: aussi craignoit-il dauantage les prudens Capitaines que les Romains enuoyerent contre luy, que les hardis & les courageux; & les forces Romaines luy furent plus redoutables sous la conduite de Fabius Maximus, que non pas sous les autres Capitaines, qui estoient bouillans & temeraires. Car en effet, apres qu'Hannibal eut défait en bataille les Consuls Flaminius & Sempronius, qui estoient tous deux hazardeux & vaillans: les Romains luy mirent en teste Fabius Maximus, qui luy fit dire, qu'il voyoit bien que Rome auoit aussi son Hannibal, duquel la prudence & la sagesse firent plus de peur & de peine à ce Chartaginois, que toutes les forces des Romains, qui n'estoient pas petites.

Iusques icy, SIRE, ie ne vous ay parlé que du conseil du Prince, que l'on appelloit du temps des Empereurs Romains le Consistoire; & les François l'appellent le Conseil Priué du Roy, & depuis quelque temps le Conseil d'enhaut. Mais il faut que V. M. sache maintenant, que les Empereurs de Rome, & les Roys de France, auoient encor un autre Conseil, auquel ils auoient recours en leurs grandes affaires, comme lors qu'il estoit question de faire des Loix pour le bien public. Les Romains appelloient ce Conseil Se-

nat, & les François Parlement : Et ce nom de, Parlement, signifioit anciennement l'assemblée des trois Estats, ainsi que dit le fleur de Commynes, & comme il se void par nos Histoires. Les Roys aussi conuoquoient quelquefois avec leur Conseil ordinaire, plusieurs grands Prelats, & Barons du Royaume; & telle assemblée estoit nommée le grand Conseil: mais du depuis ils ont transferé ce pouuoir au Parlement.

Suivez, SIRE, s'il vous plaist, les exemples de vos Ayeuls, & de ces bons Empereurs Romains, qui n'ont iamais mesprisé es choses de grande importance de prendre l'auis du Senat, & de se gouverner par ses prudens conseils. Du temps de Iule Cesar, que la Republique fut changée en Monarchie, son autorité fut beaucoup auilie: si est-ce pourtant qu'il ne se trouua iamais Empereur, qui osast entreprendre de le destruire entierement: Tout au contraire, les bons s'en seruoient pour mieux establir leur puissance. Et la raison pourquoy aucun des Empereurs, bon ou mauuais, n'osa le faire, c'est pource que par la Loy Royale (par laquelle l'Estat Monarchique fut estably à Rome) la seule puissance du peuple fut donnée au Prince, & non pas celle du Senat. Il y auoit quelque difference entre ces deux puissances, celle du peuple estoit souueraine sur les particuliers du Senat, mais sur le Corps du mesme Senat, elle ne l'estoit pas: leurs loix auoient vne autorité égale, dont les vnes estoient appellées *Senatusconsulta*, & les autres *Plebiscita*.

Vous ne deuez pas douter, SIRE, que le peuple obeyra plutost à vne Loy, ou à vne Ordonnance qui aura esté examinée par vne grande & notable Assemblée, telle qu'est vostre Parlement: & qu'il croira que telle Ordonnance sera mieux fondée sur la raison & sur l'équité, que quand elle a passé seulement par le cerueau d'un seul homme, ou de quelque petit nombre. Par cette raison, l'Empereur Alexandre Seuerus ne fit iamais Loyny Edit, qu'il n'eût en son Conseil pour le moins vingt grands Iuriconsultes, & cinquante autres excellents personnages bien experimentez: Et afin qu'ils opinassent plus iudicieusement, il leur donnoit le temps de se preparer, leur ayant fait entendre auparauant la matiere sur laquelle il falloit prononcer. L'Empereur Theodose ordonna qu'aucune Loy ne seroit valable, que premierement elle ne fust resoluë par vne meure deliberation de tout son Conseil, & en apres receuë & approuuée par le Senat de Rome: Car, disoit-il, nous connoissons bien que les Loix & les Edits qui sont faits par vn bon conseil,

sont l'establissement de la durée, & de la gloire de nostre Empire.

C'est aussi pourquoy ce grand & sage Empereur Auguste communiquoit tellement des affaires de l'Empire avec le Senat, qu'il faisoit (comme escrit Dion) vn doux & agreable meslange de la Monarchie avec la Republique : & non seulement il ne se contentoit pas de rapporter au Senat toutes les affaires de consequence pour auoir son auis : mais encor il vouloit que le Senat luy donnast tous les ans vingt Conseillers pour se tenir aupres de luy, & estre de son Conseil Priué, qui n'estoit composé que de gens fort sçauans, sages, doux, & bien moderés, tels que le Iurifconsulte Trebatius, que ce sage & genereux Agrippa son gendre, que ce docte, & protecteur des Lettres Mecenas. C'est pourquoy aussi l'Empereur Tybere, son Successeur, bien qu'il fust vn Prince plus remply de vices, que de vertus, il suiuit la voye de son Deuancier, & n'ordonna iamais rien d'important sans l'auis du Senat.

Tous les bons Empereurs ont fait la mesme chose, cōme les Vespasiens, les Tites, les Trajans, les Adrians, & les Antonins, lesquels conféroient tousiours avec le Senat, des affaires qui touchoient le Public, où ils n'entroient iamais en qualité de Maistres, mais cōme Presidens; iusques là mesmes, qu'ils ne vouloient receuoir aucuns titres d'honneur, que ceux qui leur estoient accordez par le Senat Romain. Au contraire, les Empereurs qui n'ont gueres valu, tels que les Caligulas, les Nerons, les Commodes, les Bassians, les Maximins, & les Heliogabales, qui ont tous extremement hay le Senat, & fait mourir beaucoup de Senateurs, croyans d'estre plus absolus, quand ils n'auroient plus de ces Controlleurs, qui trouuoient à redire à tout ce qu'ils faisoient : Mais l'issüe en a toüjours esté telle, que ceux qui mesprisoient & vouloient aneantir le Senat, ont fait vne fin malheureuse, & laissé à la Posterité vne infame & odieuse memoire de leurs noms.

Vos Peres, SIRE, en ont ainssi vsé, comme ces bons Empereurs Romains, quand ils estoient dans la necessité, & qu'ils vouloient pourueoir à celle du Royaume : Ils faisoient assembler les Estats Generaux, pour leur faire agréer leurs demandes, dont le pouuoir a passé à vostre Parlement; ce que je pourrois faire voir à V. M. par quantité d'exemples, si ie ne croyois que vous les sçaez par le moyen de nostre Histoire. Mais auourd'huy ceux qui vous gouvernent, & qui abusent de vostre nom & de vostre ieunesse, par vne violence extraordinaire, ie veux dire les armes à la main, ils luy

veulent oster la connoissance de vos affaires, pour acheuer vostre ruine & celle de l'Estat.

Empeschez, SIRE, vn si grand malheur, arrestez la furie de ces Tyrans, & preueniez vn coup si funeste; ne faites pas comme Charles IX. pendant sa Minorité, qui laissa ruiner la France; & puis étant deuenu Maieur, il s'en prit au Parlement, comme Tuteur des Roys: L'accusant de n'auoir pas veillé aux actions des Ministres, auteurs de tant de maux. Prenez garde, SIRE, que V. M. ne se voye reduite à vn pareil estat; bien qu'elle en soit fort proche, vous pouuez y remedier encoir, si vous voulez que le Ciel vous benisse, que les peuples vous aiment, & qu'vn chacun se dise, comme ie fais de tout mon cœur,

SIRE,

DE VOSTRE MAIESTE.

Le très-humble, très-obeissant,
& très-fidele seruiteur & fuet,

L.S.D.T.